

卓吾先生批評龍谿王先生語錄鈔

卓吾先生批評龍谿王先生語錄鈔卷七

新安後學

吳可期
吳可善 校正

序

陽明先生年譜序

年譜者何纂述始生之年自幼而壯以至于終
稽其中之行實而譜焉者也其事則倣于孔子
家語而表其宗傳之自所以示訓也家語出于
漢儒之臆說附會假借鮮稽其實致使聖人之

學黷而弗明、偏而弗備、駁而弗純、君子病焉、求其善言、德行不失其宗者、莫要于中庸、蓋子思子憂道學之失、傳發此以詔後世、其言明備而純、不務臆說其大旨在于未發之中、一言卽虞廷道心之微也、本諸心之性情、致謹于隱微、顯見之幾、推諸中和位育之化、極之乎無聲無臭、而後爲至、蓋家學之秘藏也、孟軻氏受業于思之門、自附于私淑、以致願學之誠、於尹夷惠則以爲不同、道於諸子則以爲姑舍、是自生民以

來莫盛於孔子毅然以見而知之爲已任差等
百世之上若觀諸掌中是豈無自而然哉所不
同者何道所舍者何物所願學者何事端緒毫
釐之間必有能辨之者矣漢儒不知聖人之學
本諸性情屑屑然取證于商羊萍實防風之骨
肅慎之矢之迹以徧物爲知必假知識聞見助
而發之使世之學者不能自信其心俛俛然求
知於其外漸染積習其流之弊歷千百年而未
已也我陽明先師崛起絕學之後生而頹異神

靈自幼卽有志于聖人之學蓋嘗泛濫乎辭章
馳騁于才能漸積于老釋已乃折衷于群儒之
言參互演繹求之有年而未得其要及居夷三
載動忍增益始超然有悟於良知之旨無內外
無精粗一體渾然是卽所謂未發之中也其說
雖出于孟軻氏而端緒實原于孔子其曰吾有
知乎哉無知也蓋有不知而作我無是也言良
知無知而無不知也而知識聞見不與焉師以
一人超悟之見呶呶其間欲以挽回千百年之

染習蓋亦難矣寢幽寢昌寢微寢著風動雷行
使天下靡然而從之非其有得于人心之同然
安能舍彼取此確然自信而不惑也哉雖然道
一而已學一而已良知不出知識聞見而有而
知識聞見莫非良知之用文辭者道之華才能
者道之幹虛寂者道之原群儒之言道之妄也
皆所謂良知之用也有舍有取是內外精粗之
見未忘猶有二也無聲無臭散爲萬有神奇臭
腐隨化屢遷有無相乘之機不可得而泥也是

故溺于文詞則爲陋矣道心之所達良知未嘗
無文章也役於才藝則爲鄙矣天之所降百姓
之所與良知未嘗無才能也老佛之沉守虛寂
則爲異端無思無爲以通天下之故良知未嘗
不虛寂也世儒之循守典常則爲拘方有物有
則以適天下之變良知未嘗無典要也蓋得其
要則臭腐化爲神奇不得其要則神奇化爲臭
腐非天下之至一何足以與于此夫儒者之學
務于經世但患不得其要耳昔人謂以至道治

身以土直治天下是猶泥于內外精粗之二見也動而天游握其機以達中和之化非有二也功著社稷而不尸其有澤及生民而不宰其能教彰士類而不居其德周流變動無爲而成莫非良知之妙用所謂渾然一體者也如運斗極如轉戶樞列宿萬象經緯闔闔推盈出入于大化之中莫知其然而然信乎儒者有用之學良知不爲空言也先師續承絕學接孔孟之傳以上窺姚姒所謂聞而知之者非耶友人錢洪甫

氏與吾黨二三子慮學脉之無傳而失其宗也
相與稽其行實終始之詳纂述爲譜以俟將來
其於師門之秘未敢謂盡有所發然亦不敢假
借附會以滋臆說之病善讀者以意逆之得于
言詮之外聖學之明庶將有賴而是譜不爲徒
作也已

重刻陽明先生文錄後序

道必待言而傳夫子嘗以無言爲警矣言者所
由以入於道之詮凡待言而傳者皆下學也學

者之於言也猶之暗者之於燭跛者之於杖也
有觸發之義焉有栽培之義焉有印正之義焉
而其機則存乎心悟不得于心而泥於言非善
於學者也我陽明先師倡明聖學以良知之說
覺天下天下靡然從之是雖入道之玄詮亦下
學事載諸錄者詳矣吾黨之從事於師說其未
得之也果能有所觸發否乎其得之也果能有
所栽培否乎其得而玩之也果能有所印正否
乎得也者非得之於言得之於心也契之於心

忘乎言者也。猶之燭之資乎明，杖之輔乎行，其機則存乎目與足，非外物所得而與也。若夫玩而忘之，從容默識，無所待而自中乎道，斯則無言之旨，上達之機。固胡子重刻是錄，相與嘉惠而申警之意也。不然則聖學亡而先師之意荒矣。

讀先師再報海日翁吉安起兵書序

伏讀吾師吉安起兵再報海日翁手書，至情溢發，大義激昂。雖倉卒遇變而慮患周悉，料敵從

真

容條畫措注終始不爽逆數將來歷歷若道其
已然者所謂良工苦心非天下之至神何以與
此而世之忌者猶若未免于紛紛之議亦獨何
哉夫宸濠逆謀已成內外相應雲焰之熾熏灼
上下人皆謂其大事已定無復敢撓其鋒者師
之回舟吉安倡義起兵也人皆以爲愚或疑其
詐時鄒謙之在軍中見人情洶洶入請於師師
正色曰此義無所遜於天地之間使天下盡從
寧主我一人決亦如此做人人有箇良知豈無

一人相應而起者若夫成敗利鈍非所計也宸濠始事張樂高會詞探往來且畏師之搗其虛浹旬始出人徒見其出城之遲不知多方設疑用間有以貳而撓之也宸濠出攻安慶師旣破省城以三策籌之上策直趨北都中策取南都下策回兵返救或問計將安出師曰必出下策駑馬戀棧豈知不能舍也及宸濠回兵議者皆謂歸師勿遏須堅守以待援師曰不然宸濠氣焰雖盛徒恃焚劫之慘未逢大敵所以鼓動煽

惑其下亦全恃封爵之賞今出未旬日輒返衆
心阻喪譬之卵鳥破巢其氣已墮堅守待援適
以自困若先出銳卒乘其情歸而擊之一挫其
鋒衆將不戰自潰矣已而果然人徒知其成擒
之易不知謀定而動先有以奪其心也師旣獻
俘閉門待命一日召諸生入講曰我自用兵以
來致知格物之功愈覺精透衆謂兵革浩穰日
給不暇或以爲迂師曰致知在于格物正是對
境應感實用力處平時執持怠緩無甚查考及

輪萬匝
上亦得
見之

其軍旅酬酢呼吸存亡宗社安危所係全體精神只從一念入微處自照自察一些着不得防檢一毫容不得放縱勿助勿忘觸機神應是乃良知妙用以順萬物之自然而我無與焉夫人心本神本自變動周流本能開物成務所以蔽累之者只是利害毀譽兩端世人利害不過一家得喪爾已毀譽不過一身榮辱爾已今之利害毀譽兩端乃是滅三族助逆謀反係天下安危只如人疑我與寧王同謀機少不容若有一

决宜如此
此真宜
如此

意激作之心此身已成。蓋粉何待今日動必不
慎若有一毫假借之心萬事已成。瓦裂何有今
日此等苦心只好自知譬之真金之遇烈燄愈
煅煉愈發光輝此處致得方是真知此處格得
方是真物非見解意識所能及也夫死天下事
易成天下事難成天下事易能不有其功難不
有其功易能忘其功難此千古聖學真血脉路
吾師一生任道之苦心也。幾既讀是書并述所
聞綴諸卷端歸之嗣子正億服膺以爲大訓是

豈惟足以祛紛紛之議。千古經綸之實學。亦可
以窺其微矣。繼述之大。莫善于此。嗣子其圖之。
精選史記漢書序

嘗聞之古文之與時文。其體裁相去若甚遠。而
其間同異之機。不能以寸。要皆於虛明一竅發
之。非明者莫能辨也。故曰。師其意。不師其辭。吾
有取焉爾。讀者悟夫作者之意。而不失其用。虛
稽實紆。徐縱開。變化之態。時文猶古文也。不得
其意。而徒辭之。徇何句。而研之。字字而較之。摸

擬摘實如優人之學孫叔敖適足以來明者之一噓而已予友荆川子嘗讀史漢書取其體裁之精且變者數十篇批抹點裁以爲藝文之則夫子長法國語左傳孟堅法史記固然其文皆自爲機軸而不相沿襲殆師其意者非耶子長之文博而肆孟堅之文率而整方之武事子長如老將用兵縱橫蕩恣若不可羈而自中於律孟堅則遊奇布置不爽尺寸而部勒雍容密而不煩制而不迫有儒將之風焉要之子長得

妙絕

其大孟堅得其精皆古文絕藝也荆川予是編
自謂深得班馬之髓而於漢書尤精蓋所謂得
其竅者也昔有關中士人嘗持所作請證於陽
明先師先師謂曰某篇似繁辭某篇似周誥某
篇似檀弓某篇絕似穀梁其人甚喜因諭之曰
十歲童子作老人相拄杖曳履咳嚙偃僂非不
儼然似也而見者笑之何者以其非真老人也
苟使童子飭衿肅履拱立以介乎其間人自竦
然不敢以幼忽之何者以其真童子也嘗以語

荆川子荆川深領之謂可以爲作文者之法且夫天下萬事未有不從虛明一竅中出而能得其精者也因述所聞而爲之序其端

歐陽南野文選序

予友歐陽南野子文集行於世久矣門人督學少洲馮君慮其浩博披集予予選其尤有關於學者若干篇屬會稽陽山葉子將梓以傳而門人宗伯石麓李君亦以所選集寄至遂參互校輯其得文若干篇釐爲四卷云序曰通天地萬

物一氣耳。良知氣之靈也。生天生地。生萬物而靈氣無乎不貫。是謂生生之易。此千聖之學脉也。我陽明先師慨世儒相沿之弊。首揭斯旨。以教天下。將邇濂洛。以達於鄒魯。蓋深知學脉之有在於是也。海內同志之士。見而知之。與聞而知之者。莫不知有致良知之說。然能卓然自信。實致其知者。有幾。能超然自悟於言教之外者。有幾。良知本無知。凡可以知知。可以識識。是知識之知。而非良知也。良知本無不知。凡待聞而

持之從之待見而識之是聞見之知而非良知也是皆不能自信其良知疑其不足以盡天下之變而有所待於外也道本自然聖人立教皆助道法耳良知亦法也果能自悟不滯於法知卽良知之知識卽良知之識聞見卽良知之聞見原未嘗有內外之可分也南野子蚤歲卽從先師於虔所謂見而知之者也沉粹慧敏才足以達素爲先師所授記凡振牖淬鍊蓋無所不至而其顯體默究孳孳亶亶以繼其志亦無所

不用其情予不肖辱交於南野子三十餘年受其切劘之益最深師門晚年宗說每舉相證未嘗不爽然稱快以爲聞所未聞若飲醇醴盎然且溢於面所謂交相益者非耶先師嘗謂獨知無有不良南野子每與同志論學多詳於獨知之說好好色惡惡臭乃其應感之真機戒自欺以求自慊卽所以爲慎獨也集中無非斯義所謂卓然之信超然之悟蓋庶幾焉儒臣得君自古爲難昔者河汾之學不行於身而見貞觀之

朝蓋房杜王魏諸賢爲之表章有以致之也先
師之學不啻河汾南野子身際

明聖宣昭禮樂之化過於房杜諸賢卽其所履
益信儒者有用之學於師門與有光焉惜乎天
不憖遺使大業不得終顯於世吾黨不能無遺
恨耳讀是集者知所考鏡以信以悟反求而自
得之發明此學於無窮其機有不容自己者矣

鄒東郭先生續摘稿序

嘉靖乙酉秋予偕緒山子赴冲玄之會道出睦

州少府對崖周子示予以東郭先生之集曰此
第三續稿也且屬之言予惟先生之集傳于人
久矣初稿刻于廣德次刻于維揚今復刻于睦
州雖其前後所見不無淺深精粗之異而修詞
命意一惟師說之守則先後反覆未嘗少有所
變也先師之說以良知爲宗良知者本性之靈
誠之原而物之則也意者其幾也物者其日可
見之行觸幾而應應而常寂因物而感感而常
靜虛實相生有無相形不可以致詰是義也及

門之士孰不聞之孰不能言之然能實致其知
守而不變者蓋鮮其儔以先生之才力譽望有
足自命使其更加一說以抗之亦足以章教而
鳴世而先生之心則有所不忍也夫學之不明
千百年于茲世之學者沿習于意見之偏測度
假借非溺于虛妄則入于支離中行旣鮮法守
無稽而先師首倡良知之說以一人呶呶其間
寢幽寢明僅僅以有今日蓋亦艱矣所幸良知
在人不容自泯苟非泥于意見先橫不然之心

未有聞之而不信者吾人相與一意發明宣暢而引長之猶恐告者之瀆而信者之未至况恐更加一說以滋其惑乎昔者孔子之門人各以其所見爲學而後散之四方莫相統一故傳之不能無弊求其深信不失其宗者顏曾氏之外無聞焉是雖同爲誦法孔子而意見之私有以累之也今日之弊亦居然可見矣先生服膺良知之訓緣聞而修求入于悟寡欲以爲靜非爲虛也應物以爲常非爲支也教學相長以教爲

學不以所得爲有餘而以習見難舍未能通徹以復完本體爲不足其用心可謂勤矣譬之克家之子日勤幹蠱謹守家法惟恐有所更改廢墜以陷于不孝此正同門之所不能及學之日躋于精深而未已也常語學者曰後世講學自習染之後言之退然以聖人爲不可及而不察良知本體原與堯舜無異是自畫也或失則餒其或傲然自謂與堯舜同體而不悟嗜慾汚染之所因是自欺也或失則誣皆非所謂善學也

然則先生之所自信與其所自立者有可知矣

王瑤湖文集序

儒者之學務爲經世學不足以經世非儒也吾人置此身于天地之間本不容以退托其曰爲天地立心爲生民立命固儒者經世事也然此非可以虛氣承當空言領略要必實有其事矣欲爲天地立心必其能以天地之心爲心欲爲生民立命必其能以其生民之命爲命今吾人之心與所謂命者果何物哉道喪千載絕學悠

悠天地自天地生民自生民吾人自吾人聯分
渙裂漠然不相聯屬噫救也久矣自陽明夫子
倡道東南首揭良知之旨以覺天下天下之人
皆知此心之靈貫徹天地而生民之疴癢疾痛
始與吾人休戚一體相關爲之維持撫摩以求
盡其心而致其命者始惘然不容于自己所謂
生生之仁也夫良知在人聖愚未嘗不同然而
有能有不能者利害毀譽有以救之也吾人誠
有意于經世豈忍一日悠悠其于退托漠然視

之而已也。天地萬物一體相通，生生之機自不容已。一切毀譽利害之來，莫非動忍增益以求盡吾一體之實事。隨其力之所及，在家、仁、家、在國、仁、國，在天下、仁、天下。所謂格物致知、儒者有用之實學也。豫章瑤湖王君其殆庶幾乎君與吾黨同事夫子面承良知之教，從事于斯，專志不貳，居官居家隨處發明此意，求所以自立其官于泰也，以州里之休戚爲已任，其官于浙也，以師門之休戚爲已任，一以爲慈父，一以爲幹。

予一切以身徇之不以毀譽利害惕乎其中其
退而家居孜孜車友以數學相長後進多賴之
時出赴同志之會以求交修之益晚年築室靜
養益務邃密凡毀譽利害之來不惟無所惕且
將資之以爲助卽其日可見之行庶幾所謂無
忝予所學者非耶嘉靖乙丑春予赴弔念菴子
與諸友會于洪都厥子緝錄君遺文一編示予
予展而讀之多與同志問答觀法切劘之說及
詠歌酬應之詞與夫當官興革宜民之疏雖不

屑屑以文名家要皆以真志發之以求不悖于師說非苟然者觀其請質于師有曰斯道廣大無少欠缺動靜窮達無往非學但反觀于內猶未是天壽不貳根基毀譽利害之間未免脫然師手書答曰足知用功之密只此自知之明便是良知致此良知以求自慊便是致知矣食齋一匕已知口味生平所得不可槩見已乎因并數語于冊授而歸之夫吾人既有見于良知立心立命以繼絕學之傳豈分外事耶讀是編者

能逆志以究其所學亦將有炯然不容自己者
矣

讀雲塢山人集序

珠川子銳志詞章之學有年既稟然富且工矣
一日聞陽明先師良知之說恍然若有見憮然
嘆曰斯其根本之學也乎吾之所習特枝葉爾
已間以其說發爲文詞則衆譁然非而笑之此
道學頭巾語也習之將奚以爲珠川子亦牽于
舊習未能舍其于良知之說又不忍棄也二者

往來于中久未能決今年秋予赴冲玄之會過
信江珠川子出雲塢山人集示予予讀之則前
之所謂富且工者是已及詢所謂道學頭巾語
則曰舊曾有常州集因人之笑弗欲以見也予
曰有是哉予于此旣不能舍于彼又不忍棄也
則如之何夫欲之燕則北其轅而已欲之越則
南其轅而已旣欲之燕又欲之越是惑也轅將
安適哉珠川子曰吾亦病夫志之勿立耳是以
不能進于是也予何以輔吾志予曰可哉夫君

子之學莫先辨志未有志于根本而不達于枝
葉者也亦未有徒志于枝葉而能得其根本者
也今之所謂良知之學者夫亦通其說而已未
嘗實致其良知也名爲根本而實未嘗忘于枝
葉也子而果欲實致其良知非徒通其說而已
則當自其一念靈明者專志而求之弗憚于非
笑弗眩于多岐必也忘世情忘嗜慾并其詞章
之念而忘之而後道可幾耳良知者天地萬物
之靈也子而果能實致其良知範圍曲成將于

是乎賴而況于文詞之藝乎哉故曰通乎晝夜
之道而知語知至也昔有求工畫者不在乎吮
筆含墨而在于解衣礪薄以坐之人惟能忘于
畫而後畫始工耳今者則何以異于是世之所
謂頭巾者皆泥于良知之迹而未得其精滯而
未化者也先師之集傳于人久矣子試取而讀
之果有頭巾氣否乎然則子之惑可以解矣苟
欲致知而務文詞之工是猶以隋珠而彈雀亦
末也已是集凡若干卷諸體哀然咸備子旣已

志于根本亦將以爲枝葉而忘之矣不然是固
詞章之雄也而可少乎因書以畀之且以徵子
辨志之學

國琛集序

國琛集者予同年一菴唐子所紀開國以來人
才之盛集之以爲世寶者也集凡四科蓋取魯
論聖人君子善人有恒之義不以時不以類不
以品小大偏全錯而陳之各擅其所美其要主
於發明此學以蓄德而廣才固非病于方人也

夫學心學也。人心之靈，變動周流，寂而能感，未嘗不通也；虛而能照，未嘗不明也。此千聖以來相傳之寶藏，人人之所同有。惟蔽於私而始失之學也者，學去其蔽而已矣。非有加也，何也？夫心之通明，謂之聖。聖人者，生而知之學之的也。君子以修言，善人以質言，有恒以基言，皆學而知之者也。而惟有恒則可以進於善人，君子而入於聖，小者大偏者全。唐子所謂斯四科者，不於文不於行，皆自其心論之，非其心則弗取也。

隆殺賓主之義存乎本述願學之意存乎注脚
譬草蛇灰線而生氣行乎其間在明眼者取而
觀之此紀集之本意也粵自明興以來學術漸
著肇於薛敬軒沿於吳康齋胡敬齋而闡於陳
白沙敬軒以行修康齋以悟入敬齋祖薛而得
證於吳白沙宗吳而尤主於自得學將有所歸
矣延綿衍溢至於陽明夫子首提良知之旨示
之學的而後燦然大明國將興必有此以開其
先蓋徵之也此千古血脉流行生化之機不以

意測不以識求以此畜德則德日新以此廣業則業日富轉移人心之要綱維治化之原學之大全也夫自良知之說傳流海內人孰不聞然能實致其知者有幾唐子欲以討真心爲刺贅真心孰從而討之夫真心者言乎有恒之心天地之道恒久而不已吾人果能持其有恒之心究夫虛寂流行之機以求其所入而不以意識參乎其間聖學庶有賴也已若曰執權衡以較輕重而以方人病之淺淺乎知唐子矣茫茫太

虛孤懸一掬其誰幸以助予此唐子苦心也故敘而終焉、

三錫篇贈宮保梅林胡公

嘉靖庚申春宮保制帥梅林胡公以平倭偉績受

天子明命署以

青宮之銜錫以團玉蔭以錦衣寵至渥也凡在交承之下者咸旅進于庭所以頌公之德表公之功彰公之寵殆將無所不用其情矣予復何

難言
故

言哉竊惟居德者忌居功者怠居寵者危古人
所深戒也爰述三錫篇以爲萬一之助嘗讀易
師之九二曰在師中吉王三錫命謙之九三曰
勞謙君子有終吉公以師中之德荷三錫之命
則旣以承天之寵矣勞而能謙乃克有終固公
所宜自盡期以圖報於將來者也夫虧益流變
福害好惡之應天地鬼神於盈謙之戒昭昭矣
禹爲大將出師以討桀爾逆命之苗宜無所不
可而伯益矢謨至有滿損謙益之戒禹又從而

拜受之蓋深知夫天道之不可違也。今夫祿位
名壽皆天之所以命於人而人之所以自奉其
身者也。大德之人必得若執左券以索寄然者。
是非有心於得之也。舜之大德量如太虛未嘗
有一毫外慕之心。其視祿位名壽之加於其身
與去於其身如萬象交變出沒於太虛之中。神
竒臭腐無所揀擇亦無所增減。故飯糗終身。袵
衣固有太虛之體固如是也。吾人德不加舜量
不如太虛未能忘乎外慕之心而於外物之奉

身者乃欲屑屑焉求備以自蹈於盈滿之戒亦見其惑也已夫角與而齒缺翼附而足虧在物且然而況於人乎歷觀三代以後之大臣善處成功之際而能保命以終吉者有幾祿盛者或晦於名位尊者或劣於徂名高者或畱於壽而壽永者或儉於祿豈惟德之不逮於古固亦氣化之漸薄夫人乘之自不容於求備也與奪翕張或裒或益大化默司其柄吾人終身浮沉於大化之中特不能以自覺耳公自巡察而轉中

好好
說着
了

丞提督未幾而轉司馬總制人言藉甚忌且謗
者紛紛未已今日之事公於科第才望黜名三
者皆足以自致通顯但一旦驟遷同儕盡屈其
下心不能以盡乎況乎權位重而責愈備經費
浩而迹愈疑以一人之情擅六七省之刑賞而
德怨易至於橫生以一人之力答千萬人之祈
望而恩澤每病於難溥夫以不平之心加之以
東全之意則夫忌嫉疑謗之來固宜有所不免
而亦非人之所能趨避也公自任事數年於茲

經理浩穰。心殫力竭。雖屢獲奇功。而亦屢蹈危機。自古豪傑。當大任成大功者。未有不從憂患中得之。惟公心慈量宏。生平以厚自處。未嘗有讐物害人之心。履信思順。鬼神實相之。故每遇凶而獲吉。因敗以爲功。公誠福人也哉。方

新命未下之時。當事者尚有屯賞之議。及旣下。人情亦有靳於使相之疑。公皆不得而與也。公之處此。惟當兢兢自反。自艾益修厥德。鑒於易書之戒。審於氣化之徵。揆諸成功處功之跡。謙

折衷獨中。心無然。不能勝。非惟不覺。而終覺
之。前而亦不當有直益之望。始足以答人言。而
曰。天命所謂君子有終而吉也。公天柱本來近
道。內夷城府外弛。遠近雖處兵革紛冗之中。亦
未嘗廢學。居常油然情。雖暢而不綴。臨變惕若。
志雖鬱而不撓。度能容衆。似混而辨。機能料敵。
似顯而藏。至於忙中批答。醉中應酬。卽愈過憤
擾之餘。可以覆覆什百。未嘗遺一。非其主宰凝
定。而條畫分明。未易以涉斯境也。公自謂學問

未能入細不欲吾儕以精微之說瀆之此尤見
公得其大處先師有云學貴有序先清理會大
略然後精微可得而盡如孔明讀書先觀大旨
未爲無見不然反易溺於瑣碎非善學者也然
則公殆所謂善學者非耶雖然精微則烏可以不
盡舜之德同於大虛而無累於外物者以其
能察於危微而致其精一之功也微者聖學之
宗不雜於人心之謂精純乎道心之謂一精一
而後能致虛致虛而後能忘累故曰舜有天下

好一篇
文章

而不與言有而不居也公之學果能進於是亦將與舜爲徒而三命之寵與諸福之物亦將申錫於無疆矣走也知公最深故望公彌切區區漫述固亦矢謨之意期以發德于有終也公亦將有以受我否耶

贈梅宛溪擢山東憲副序

昔者孔門言志由求亦志在得國而治斷斷于兵賦禮樂之事曾點之志浴沂風詠不出日用之常若無所事事者而夫子所與顧在此而不

在彼豈其深有契乎其中爾耶。儒者之學務于經世。然經世之術約有二端。有主于事者。有主于道者。主于事者以有爲利。必有所待而後能寓諸庸。主于道者以無爲用。無所待而無不足。入者爲主。出者爲奴。見使然也。惟見有大小。故有無之迹。乘之見之小者。泥于有。見之大者。超于無。斯固點之所以爲狂。而異于三子者之撰也。昔有求工畫者。晨皆吮墨。伸紙奔走以待用。一人獨解衣盤礴而坐。此真工畫者也。夫知工

妙妙

者不在于吮墨伸紙而在于解衣盛礮之人
則知夫子與點之意矣三十幅共一轂當其無
有車之用鑿戶牖以爲室當其無有室之用人
知有之爲利而不知無之所以爲用也人知用
之爲用而不知無用之所以爲用也而世之儒
者未免溺于有無之迹而二之其有者以兵賦
禮樂爲麗奇浴沂風詠爲臭腐是不鑒牖而求
室之用也其無者以兵賦禮樂爲臭腐浴沂風
詠爲神奇是去輻而求車之用也間有略知二

者之偏而思有以易之其言曰道之真以治身其緒餘以爲國家其土苴以爲天下似矣夫旣曰以道治身所治孰非事耶旣曰以其緒餘土苴爲天下國家緒餘土苴孰非道耶夫道與事未嘗相離也有無相因以應于無窮二者混而爲一是謂經綸無倚而達諸天故曰上天之載無聲無臭此孔門家法也宛溪子志于儒者之學有年矣今之守越也秩二千石九槎之堂施黃以表觀畫封履畝圍其民于中者殆方千里

不可爲非得國而治矣。一切張弛提舍以政爲
學。練兵稽賦。崇飭禮樂之教。盤根之所割。大竅
之所批。聲光風采。矯然振于一時。不可謂無所
事事矣。是將有所待與否。何如也。立乎不倚之
地而行乎無轍之塗。動于靡闢之門而藏于無
局之鑰。優閒容與。章冠詠歌。出于注措經綸之
外。隱然若有當于古之狂者。所謂以無用爲用。
殆庶幾乎非邪。予不肖無足以契乎其中。而與
子而子之志則遠矣。三年治成。擢副山東觀察。

行有日矣。屬令葉君某、陳君某輩奉其道術之教，施于八邑。恨其將去而惜無以承之也。以予爲有一日長，徵言于予以道志。夫儒者之效，缺然不見于世。許時于茲，山東夫子之鄉，沂雩之遺風猶有存者。而茲行適當暮春之景，浴于斯而風于斯，俛仰千百年之上下，可以陶然而詠矣。

贈益泉陳侯被召北上序

予嘗觀前史，猶更傳爲無赫赫之名，而有肫肫

之實竊以爲史臣之溢美爾世豈有實不副而
名乃過之者哉今得吾益泉陳侯之爲政乃知
史臣之書誠有所未易測者陳侯起進士嘗出
宰會稽以憂去邑人思之山陰與會稽接壤附
郭惠政所均邑士夫請于當路復得宰山陰吾
侯之於山陰也約已裕衆時以文學飾吏治期
年而治洽三年而政有成仁惠流傳士民安之
銓司廉得其實疏名于朝以檄召行有日矣吾
邑士民咸曰陳侯良吾父母世豈多有如陳侯

之惠我者哉。問其政。嗒然莫知所對。予然後知循吏之不可及。而史臣爲不誣也。古今論治。不同其大要。不越于刑政教化。本末之間而已。世道下衰。議政則遺化。議刑則遺政。拂其所性而民之心益離。嗚呼。人情不大相遠。治之者。顛本末之序。徃徃至拂其所性。此循吏之書于史者。常少也。三代以後。爲君者。莫盛于文景。爲循吏者。莫盛于西京之世。然編史者。于文景無可紀之德。于循吏無可蹟之政。何哉。教化之盛。如慈

好

母之煦子如春膏之潤物發于至誠泯于無朕
而受惠者莫能爲之辭也或者曰侯之政簡而
不苛紆而不怠又當兵興之日百役具舉侯以
耐心措注其間事集而民不知擾此豈非所蹟
者哉予曰然哉斯固幹局之良也而予之所取
于侯者則以其有仁者之心政敷而刑緩教彰
而化協率其心之所安以宜民而不自以爲功
也傳曰肫肫其仁其庶也乎哉古人之學至誠
經綸而無所倚侯也有志于是是謂經綸天下

可以達天德區區漢之循吏有不足擬者矣予
因諸士夫之請相與述民之情爲侯贈且將以
進侯于古也

送王仲時北行序

昔者子思子憂道學之失傳而作中庸中庸傳
道之書孔氏之家學也其終篇尚綱之云惓惓
于君子小人闇然的然之辨而歸淡之一言蓋
惡文之著而思反其質質其道之本乎夫自周
末文勝學者溺于浮華奢泰之習務功利而忘

忠信人心日壞孔子身任傳道之責將以挽回
世教而無從也乃志于從先進以求之于野其
曰十室之邑必有忠信不如丘之好學明學所
以全忠信而忠信之外無學也然則尚綱云者
其諸從先進之志乎所謂淡者其諸忠信之義
乎故曰中庸傳道之書孔氏之家學也夫忠信
之在人譬之五味之淡五色之白五音之希聲
淡者味之本也白者色之本也希者聲之本也
故禮尚玄酒易著白賁而樂貴朱絃以存本也

君子于此可以觀學矣。自漢而下世教日衰。學者安于所習而不知返。蓋千百年于茲矣。吾

師陽明夫子生于絕學之後。憫人心之溺而忠信之益薄。首倡良知之說。思以易天下而挽回之。嗶嗶焉濱于危且困而弗恤也。良知之說始于孟氏而傳之于思。卽中庸所謂獨知者是也。數十年來此學之信而從者幾徧海內。蓋良知之在人心。感觸神應。有不容自己耳。吾子仲時師門之嗣子。尤海內同志所屬望。而家學將有

賴焉。吾子質慧而好修志于學。馴其所至。知其必爲君子。必不爲小人無疑也。而勿遭多難。南北奔馳。依依外氏之庇。操慮日危且深。殆庶幾早達者非耶。夫吾師德在人心。而業在天下。崇報之典鬱而未彰。蓋久將有待也。廼者聖天子推恩賢宰。執贊議重以申錫之命。進吾子于太學。將養之以需其成。茲其兆矣。雖然。吾子此行入仕之始。世味方濃。而聲色之移人尤甚。口體耳目一溺于所好。其流弊將有不可勝言者。識

者不無隱憂焉。昔之人有聽古樂而聒聽鄭衛之音而不知倦。此無他好有所溺。則人心變矣。存亡之幾。辨之在早。而反之在力。吾子其務弘乃質崇。乃志懋。乃學反。諸獨知之良祛。其所調的然者。就其所調闇然者。以無忘尚綱之意。寧過于野。無寧過于文。一洗功利浮華之習。以全其忠信而不爲聲色世味之所溺。則幾於道矣。慎斯以往。德將自此日崇。業將自此日廣。善于繼述。吾師未盡之志。將有所托而傳。追惟子思

子之家學庶幾有光而無忝也是豈徒不失望于海內之同志而已乎吾子行矣

原壽篇贈存齋徐公

萬曆丁丑歲存齋徐公壽七十有五秋九月二十日值其懸弧令辰走羈俗緣未能如期赴候首述危言一編屬通家門人陸子光宅洎季兒應吉往昇賓筵用申觴祝之敬吾人生于天地間百歲爲期天地賦我以形道爲之紀日可見之行惟出與處其道無所不在也出則以其道

誰謂

格于上下輔世長民以蕪善天下處則以其道
獨善其身守先王之法以開來學若無一善狀
徒以其七尺之軀久生于世非有道者之所貴
也古之至人達而壽者莫如文王處而壽者莫
如孔子其曰周王壽考遐不作人曰不知老之
將至此壽徵也曰穆穆文王緝熙敬止勉勉我
王綱紀四方曰辟如天地之無不持載無不覆
幬萬物並育並行而不害不悖此德符也德以
基壽壽以昭德夫人之所知也若夫積德以凝

命爲壽之原譬之北海玄珠得於罔象非夫人
之所知也先師有云心之良知是謂聖天地之
靈氣結而爲心心之靈明謂之知清虛昭曠百
姓之日用同於聖人之成能此萬化之綱千聖
學脉也意者心之用識者知之倪心體粹然意
則有善有惡良知渾然識則有是有非善惡則
好惡形是非則取舍見萬病皆起於意萬緣皆
生於識心之良知本無善惡本無是非譬之明
鏡之鑑物妍媸黑白皆其所照之影應而無迹

過而不留意與識卽所謂照也真心無動而意有往來真知無變而識有生滅以照爲明奚啻千里知此則知文王孔子致壽之原矣昔人頌文王之德曰不識不知紀孔子之學曰無意無必意者病之所由以生識者緣之所由以起也意根於心則善惡自無所淆而意爲誠意識變爲知則是非自無所眩而識爲默識無識則知亦忘無意則心亦冥譬諸太虛之體不和諸相而亦不拒諸相萬象往來於太虛之中而廓然

無礙文王孔子所以順帝則而達天德也夫意
與識非二也識有分別意爲之主意有期必識
爲之媒是謂一病兩瘡交相成也孔門惟顏子
爲善學有不善未嘗不知未嘗復行不遠而復
孔子稱其庶幾以其屢空也子貢而下未免多
學而識以億爲中空者虛明之體億識則非空
矣此回賜之學所由以分也顏子沒而聖學亡
後世所傳惟子貢以下一派學術漸漬染習認
賊爲子雖在豪傑翹然以知學自命者亦且陷

於其中而不自覺可慨也已自陽明先師提出
良知爲宗孔周之絕學賴以復續信而從者遍
海內學者砢於舊見且閔然指爲異學豈非亦
有似是而難明者乎不佞於公出處之槩重有
感焉公深信師門之學力肩斯道爲善類所歸
向非一日矣出也以其學行於

朝秉國之鈞承 天之寵經綸密勿定大計決
大疑以天下安危爲已任倡明正學淑人心而
開泰運視群邪之訕如狂瀾之撼砥柱屹然無

所也其處也以其學行於家宅心淵默應緣無
涯篤於倫理重朋來之樂徜徉峯泖之墟修身
以見於世視群小之愷若飄風之過耳漠然無
所入也尚友千古道合志同其於文王穆穆勉
勉孔子合德於天地殆庶幾乎慕焉而若有契
也夫文王望道而未之見孔子倪焉而不知年
數之不足至人不已不厭惟日不足之心有如
此者走也辱公之愛最久而荷教最深八十衰
僂徒以不肖之齒稍長於公步趨追從絕塵以

奔蓋若瞠乎其後也惟公莘莘疊疊法天之行
時向邁而德日新年有加而學無盡如神龍遊
於昭曠之域出則爲見處則爲潛將與孔周相
忘於千載之下絕意去識啟心之靈以綿道脉
於無窮與太虛同體亦與太虛同壽百年之期
有未足多者矣此固區區同心之願也

壽鄒東廓翁七袞序

自聖人之學不明于世世之學養生者務爲異
術壽謬泥執併老氏之旨而矢之是非養生者

之過聖學不明之過也聖人之學復性而已矣
人受天地之中以生而萬物備焉性其生理命
其所乘之機也故曰天命之謂性此性命合一
之原也戒慎恐懼其功也不覩不聞其體也良
知者性命之則知是知非而微而顯卽所謂獨
也戒慎恐懼而謹其獨焉則可以復性矣故存
之無不中而發之無不和先師所謂戒慎恐懼
而中和出焉是也中和致則天地此位萬物此
育而無外內顯微之間此聖學之的也知此則

知東廓先生所受之學矣先生之事先師四十
餘年于先師之學終始發明惟歸一路未嘗別
爲立說以眩學者之聽聞先生生平以翕聚同
志爲已任東南學者之會以十數每會必如期
先往後期而歸虛受并包務期獎掖朋友有過
未嘗顯斥微示之向而使入之意自消辯論有
未合者未嘗必其強同稍爲分疏使自思得之
故人皆得盡其所請而樂爲之親擔負聖學卓
然爲海內儒宗同志賴焉志純履謙所見者日

遂嘗曰吾始也戒慎于事爲已而戒懼于念慮其後則乃戒懼于本體夫戒懼于事爲者點檢形迹所志末矣戒懼于念慮者雖防于發端尚未免於生滅之擾若夫戒懼于本體則時時見性以致于一念慮者本體之流行事爲者本體之發用圓融照察日以改過爲務無復本末內外之可言矣此先生之學也是年先生壽七十六春二月某日值其懸弧之辰宣州水西門人周子怡率其同門之友若干輩將旅進于庭以壽

先生而屬言于予予惟欲觀先生之壽當觀先生之學知先生之本而先生之壽益有足徵矣先師嘗曰戒慎不覩恐懼不聞則神住神住則氣住精住而仙家長生久視之說不外於是是說也人孰不聞亦曰有爲之言耳先生獨信之不疑不淆于異術故行年七十視聽不衰而精氣益強非一于神守能若是乎而世之養生則異于是裂性命爲兩端分內外爲二物或迷于罔象或滯于幻形甚至顛溟濁亂惟軀殼渣滓

之爲狗豈惟不知聖人之學所謂并老氏之旨而失之者也常無欲以觀其妙常有欲以觀其竅萬物芸芸以觀其復非老氏之言乎觀妙卽未發之中性宗也觀竅卽發而中節之和以情歸性而機在我命宗也觀復卽慎獨常明之旨也不睹不聞卽本體之藥物也戒慎恐懼卽功夫之火候也種種名義特假象之寓言耳故曰得一而萬事畢此殆先生之所自信自改俛焉孳孳而不知其老者乎雖然得一爲難忘一尤

難知忘是非知之至也忘則無住矣是謂無心
之得仙家亦有神還于虛之說然則先生之學
往耶忘耶虛耶先生處家內外和翕子姓昌明
人道之福方至未艾所以滋壽而徵諸學者無
窮同志所依以從事亦將賴以無窮也爰述先
生之所受者因以質於先生

壽史玉陽年兄七十序

玉陽子志于聖學有年中年好長生復習爲修
命之術旣築玉潭仙院以見志晚乃更求幽勝

于句曲之墟作園室若干楹翼以飛樓繚以石
壇塹以深渠總爲護真堡狀若蓬島聚糧其中
外內限隔期過七十卽將捐室家絕交遊屏棄
世緣入室練養以觀無始而朶遂其所欲約五
七年功成而後出其迹可謂太奇矣夫王陽子
之爲此也豈以儒者之學止于了性故別朶修
命之術蘄于兩全而得之乎予固不得而知也
夫儒者之學以盡性爲宗性者萬劫無漏之真
體祇緣形生以後假合爲身而凡心乘之未免

有漏故假修命之術以鍊攝之使滌除凡心復還無漏之體所謂借假修真修命正所以復性也卽以養生家言之性以心言命以身言心屬于乾身屬于坤身心兩字卽火卽藥一切斤兩法度老嫩淺深皆取則于真息真息者性命之玄機非有待于外也是故盡性以致命者聖人之學也修命以復性者學者之事也及其成功一也若謂儒者之學不足以養生而別取于命術是自小也且老氏嘗有長生之說矣大都人

生以百年爲期五情苦樂四體安危古猶今也
百年猶以爲多則所謂長生者自有所指非執
吝形骸之調也後世養生之說未免滯于形骸
卽爲凡心有漏之因并老氏之旨而失之矣今
玉陽子年已七十矣行將入室有期室家果可
得而捨乎交遊果可得而絕乎世緣果可得而
棄乎吾知有所未能也苟凡心未了縱使入室
未免坐忘而坐馳爲累更大吾知有所未遂也
孔子曰吾非斯人之徒與而誰與則知儒者之

學未嘗外于人道但不爲其所累耳若棄之絕之不然遺世而獨立是豈人之道也哉孔子年七十曰吾從心所欲而不踰矩先之曰五十而知天命知天命者志與天通其動以天無復凡心之爲累故能從心所欲而不踰矩矩者天命之則未能知命心不可得而從也所望于玉陽子惟在益堅爲聖人之初志以知命從心爲的默識玄機以觀無始不爲後世養生之所滑使世之學者曉然知玉陽子之爲人志于學孔者

不務爲竒迹者也不外于人道而能無所累者也豈不偉然大丈夫哉同心之言不嫌規勸因書以畀之賓筵

松原晤語壽念菴羅丈

君子之學以盡性爲宗以無欲爲要以良知爲訣人生而靜天之性也天性本無欲凡有欲皆生于動故曰感物而動性之欲也良知者性之靈而物之則也雖萬欲紛擾之中良知未嘗不知致知者所以寡欲而復性也自孔孟以來性

學不明于天下久矣我陽明先師首揭良知之
旨以教天下世之學者莫不知有良知之說其
能卓然自信實致其知者有幾予曷慰學者之
望哉良知本虛天機嘗活未嘗有動靜之分如
目本明如耳本聰非有假于外也致知之功惟
在順其天機而已有不順者欲爲之累如目之
有翳耳之有垢非聰明本然也累釋則天機自
運翳與垢去則聰明自全矣離婁之明師曠之
聰天下莫加焉然其耳目初未嘗有異于人也

世之人不能自信其耳目而謂聰明卽與師曠
離婁異者謂之自誣不務去其翳與垢而謂聰
明卽與師曠離婁同者謂之自欺噫今世學術
之弊居然可見矣予不類辱交于念菴子三十
餘年兄于良知之教所謂能自信而致之者非
耶兄與荆川子齊雲別後不出戶者三年于茲
矣海內同志欲窺見顏色而不可得皆疑其或
偏于枯靜予念之不能忘因兄屢書期會壬戌
冬仲往赴松原新廬共訂所學至則見其身任

均役之事、日與閭里之人執冊布笑、交涉紛紜、其門如市而耐煩、忘倦、略無一毫厭動之意、夜則與予聯床趺坐、往復證悟、研二氏、究百家、意超如也、自謂終日紛紛、未嘗敢憎厭、未嘗敢執著、未嘗敢放縱、未嘗敢褻侮、自朝至暮、惟恐一人不得其所之心、康濟天下可也、尚何枯靜之足慮乎、因舉乍見孺子人井、怵惕、未嘗有三念之雜、乃不動于欲之真心、所謂良知也、與堯舜未嘗有異者也、若于此不能自信、亦幾于自誣、

矣。苟不用致知之功，不能時時保任此心。時時無雜，徒認現成虛見，附和欲根，而謂卽與堯舜相對，未嘗不同者，亦幾于自欺矣。蓋終日應酬終日收斂，安靜無少奔放，馳逐不涉二境，不使習氣乘機潛發。此兄歸宗得力真功夫。所謂實致其知者也。其謂世間無有現成良知，知非萬死功夫斷不能生，以此較勘世間虛見附和之輩，未必非對病之藥。若必以現成良知與堯舜不同，必待功夫修證而後可得，則若未免于矯。

枉之過。曾謂昭昭之天與廣大之天有差別否。此區區每欲就正之苦心也。夫聖賢之學致知雖一而所入不同。從頓入者。卽本體以爲功夫。天機常運。終日競業。保任不離性體。雖有欲念一覺便化。不致爲累。所謂性之也。從漸入者。用功夫以復本體。終日掃蕩欲根。祛除雜念。求以順其天機。不使爲累。所謂反之也。若其必以去欲爲主。求復其性。則頓與漸未嘗異也。稽之孔門。顏子竭才不遠而復。便是性之樣子。仲雍居

欲強怨邦家無怨便是反之樣子吾人將何所
法守耶世間薰天塞地無非欲海學者舉心動
念無非欲根而徃徃假托現成良知騰播無動
無靜之說以成其放逸無忌憚之私所謂行盡
如馳莫之能止此兄憂世耿耿苦心殆有甚焉
吾輩所當時時服食者也嘗憶荆川子與兄書
有云偶會方外一二人其用心甚專用力甚苦
以求脫離欲海祛除欲根益有慨于吾道之衰
蓋禪宗期于作佛不坐化超脫則無功道人期

于成仙、不留形住世則無功、此二者皆不可以
僞爲、聖賢與人同而與人異、皆可假托混帳、誤
已誑人、以世間功利之習心、而高談性命、傲然
自以爲知學、不亦遠乎甚矣、荆川子之苦心、有
類于兄也、是月十有四日爲兄五十九年初度
之辰、因漫次其語、納諸松原、以致壽祝、夫一動
一靜之間、天地人之至妙者也、世人不能久生、
只是多欲、兄以盡性爲學、將寡欲以至于無已、
能不落動靜二境、終日收斂順適、耳目聰明、一

念明定將與天地無疆壽兄祝兄宜莫出于此者若夫桑榆之景相許莫逆而繼以調笑予弟能也

從心篇壽平泉陸公

萬曆戊寅歲仲春九日實惟平泉陸公七十誕降之辰門人陸子光宅謂余曰陸先生之年稀矣海內遠近交游皆致辭以侑觴祝吾師爲石交况嗣子應吉與宅同事先生其義尤篤情尤不容已可無一言以致之余曰可哉余自八十

以來心戒不爲應酬文乃者同心之言非戒例也夫學莫先於立志尤莫切於辨志志有大小孔子自謂吾十有五而志於學學者大人之學以天地萬物爲一體志有定向由辨之早辨也守之十五年而後能立習氣不能淫其志凝矣又守之十年而後能不惑衆言不能淆其志熙矣又守之十年而後能知天命志與天通也至於六十而耳順順與逆對耳順者無復逆耳之言志忘順逆也忘斯神矣始至七十始超然自

命曰從心所欲而不踰矩。從心者。縱心也。神斯化矣。不神不化。心未可得而縱也。矩者。先天之則也。欲者。後天以奉天時。天地萬物有所不能違焉。惟欲卽矩。惟矩卽欲。天縱之也。譬之學射。天地萬物示其的矣。審固以期於中。繫心一緣。習之法也。久習則巧。後雖無心。縱矢所發。無不中的。不習而無不利矣。然此只是志到熟處。非有所加也。所謂終身經歷之次第。卽其近似以自名也。以余觀于公之所履。有足以啟予者。公

自幼有志于學以孔子爲師辨之已早弱冠發
冠科晉陟無仕優游進退經綸大業日就光顯
簡在帝心群望所屬天下以其出處卜世道污
隆不淫于習不渝于衆其動以天不以順逆介
於衷幾於忘矣晚年踐履益熟所得益深蓋其
學大人之學而其心天地萬物之心也乃今壽
躋七十心若可以縱矣公方日以莊嚴自持競
競以循天則一毫不敢以自逸也昔者魯男子
以其不可學柳下惠之可孔子以爲善學若公

者所謂善學孔子非耶公深于竺典余嘗戲曰
公入得佛入不得魔意其莊嚴之過若以世爲
魔境衆爲魔黨不屑混迹同塵相忘於一體佛
與魔尚爲對法非究竟義也蓋能忘分別之意
以無心應世魔卽是佛纔起分別之心非背卽
觸佛縱成魔譬之虛谷之答響明鏡之鑒形響
有高下形有妍媸分別熾然而谷與鏡未嘗有
心以應之也良知知是知非而實無是無非知
是非者不壞分別之相無是非者無心之應也

育樂公言金
立志之辨。辨諸此而已。夫自七十以上。至於耄期。壽無盡。學亦無盡。不但已也。會須脫去莊嚴氣象。渾同世出世法。卽五濁世界爲道場。從衆生心行作佛事。坦然平懷。入于神化。無佛可成。無魔可遣。是調得無所得。而忘無可忘。顧同心交修之願。非徒一時情義之好而已也。公也念之哉。

壽近谿羅侯五袞序

嘉靖甲子春暮。予赴近谿。使君之期相會于宛。

陵晨夕證悟頗盡交修且得觀菁莪之化聞絃
誦之聲若身際武城而神游中阿之曲可謂千
載一時矣浹辰復過水西與諸友爲信宿之處
貢子玄略周子順之王子惟禎輩率諸友請于
予曰近谿公蒞吾宣州以萬物同體之學施化
于六邑其視六邑之人若一家之子弟無不欲
煦養而翼護之其於水西諸生尤嘉惠栽培若
楚之有翹將藉此以爲六邑之倡也諸生感德
于公尤深且至五月二日值公五袞初度之辰

諸生稱觴致祝不敢後于六邑之人公之知心
莫如先生敢斬一言以侑觴祝予曰可哉斯固
予之情也既歷天都黃山假館于紫陽之墟方
期構思屬稿忽假寐若告予曰子欲爲羅君壽
乎鳶飛戾天魚躍于淵詩人詠歌可以致辭矣
予醒而訝之有是哉信乎精誠之通也使君之
學粹瑩冲和同體萬物中心洞然無局府之隔
外境超然無形迹之滯燕笑容與意度融豁信
有淵魚之活潑其施化于六邑也彥而秀者旣

授之館而強教之在野而凡者復爲之約而訓
飭之雖窮鄉僻壤使君之精神無不流注若三
尺之童垂白之叟無不被使君之膏澤而思有
以自淑也蓋使君之心以六邑之心爲心六邑
之人有一不化于善使君之心歉然有所未盡
也一時作人之盛所謂成人有德小子有造庶
幾近之矣信乎夢之爲覺而精誠之通有以也
使君自南宮中選不就 廷試十年庭除唯諾
諭親以道訓子弟以義方修身以教于家者植

根既深且久故其發之于用暢達扶蘇有同于
其棠之蔽而人自德之嘗觀使君教人使人當
下識取不作擬議不涉安排不間以凡心蓋一
念真機神感神應非人力可得而與也纔作擬
議纔涉安排卽非神機之感應使君以此得悟
卽以此教人出之有本不徒聲音笑貌之爲以
故六邑之人皆能信使君之心薰炙于道義而
感之尤速也吾人知使君之化方知使君之學
所以爲使君之壽者不外學而得之矣水西諸

生果能以使君之學爲學盡去其凡心神機益
然不犯人力足以倡于六邑之人所謂徧爲爾
德而壽考願于使君者不在于言而在于身使
君之心斯慰耳若面從其教而身違之耳聆其
訓而心悖之使使君之化闇而不章鬱而不暢
則雖盛筐篚侈歌頌克溢于使君之庭亦徒爲
觀美而已使君之心知有所不樂也區區此言
雖未足以盡發使君之蘊庶幾爲知使君之心
授而書之以告諸人使君其復以進我否耶

壽東丘吳君七袞序

新安休寧有東丘吳君商山隱君子也宋文肅公敝之後自文肅迨君凡十世世多聞人公天性穎異自幼志于古人之學嘗聞學於陽明夫子與聞良知之旨補郡文學晉太學生選授閩藩司理期年相繼丁內外艱深以不得侍親終爲恨服闋遂不復起已乃闢園圃葺亭榭花木爲逸老之計建書院于里之東丘群友講學聚諸弟子卒業其中訓之曰人生須以古人爲

斯知得天之所以與我何在方爲不負所生因
自號東丘隱然以愚自況表見希聖之意其志
可謂遠矣歲丁丑壽屆七十夏六月十七日值
其懸弧之辰友人等乞言于予以侑觴祝

予嘗講道斗山福田往來白嶽間知公行履甚
悉仲子繼俊久從予遊雖微諸友之請固所樂
道而不容已也予平生不爲過情之譽請以所
聞與其所自況者爲公道之輔成其志良知知
是知非而實無是無非無是無非者無知也無

知所謂愚也。世之士人不能入于道者，只爲根性太利，知見太多，聰明太露，不能收斂，翕聚反還，淳朴所以失之，以拙爲道之質。當學敏捷，以鈍爲道之鄙。當學對美，以蒙爲道之塞。當學智能，以冥爲道之昧。當學便慧，曰拙；曰鈍；曰蒙；曰冥，皆愚之名也。精神愈泄，機械愈深，是非愈明，純白愈傷，而去道愈遠。人知神之神，而不知不神之所以神，不神之神，卽無知之知。故曰：迅雷風烈，莫不蠢然；蠢然者，卽所謂愚也。審其幾，謂

之不睹不聞克其至調之無聲無臭而其要不
出于一念之微此天之所以與我之真性聖愚
之所同也顏子之四勿廢而爲愚者也故能有
見于卓曾子之三省魯而爲愚者也故能有契
于唯此孔氏家法師門之的傳區區數十年學
而未能者也君果有志于此不以世情機智叅
滑其間不惟養德而所以保壽命之源亦不外
此君居家孝友儉于自奉富而能施與人交不
立城府鄉人有犯容而不報宗黨稱爲長者其

音義卷之六 言金 三三
他懿行種種皆人所難及公不欲以此自多予亦不欲以此爲譽也公年七十予亦老矣于世間更有何事放不下請揆諸一念其進此道固千里交修之望也

西川朱君壽言

江山白巖柴子偕朱生夏訪予稽山草堂談學之餘縱言及于養生之說莊生有云恬愉不可得而兼旨哉膏梁之士宅身繁廕慮危涉患之機多故厚其生而滑其志遯世山澤之臞志若

可以自得而窘約焦瘁每啻于外養以苦其生
欲全天年以保壽命之和者必恬與愉相滋而
後爲養之備斯亦難矣柴子俛焉若思起謂予
曰予鄉有朱君西川龍者迹其所自立殆庶幾
于是耶予曰何居請言其凡柴子曰朱君髫齡
穎異常習舉子業傷于貧慮無以自養不能植
生以養其親非人道也遂棄去與其弟姪挾資
走齊魯蹈楚與蜀周流萬餘里貿遷經營務以
忠信爲本爲衆所依資乃大進其兄料理家政

每以所入佐之不屑屑然也。性寬厚樂施宗黨有貧乏者隨力以周無恡情間有不率意相忤者含忍隱讓以俟其化亦無嚴色。城府坦然鮮事機知而以其舉子業授其子夏曰此吾未盡之志也。雖處豐腴若超然處于世外以恬其心而志不疚。雖似山澤之臞益之以具修之物以爲身愉而養不匱。其子夏有志于學力行好修人多以爲迂。朱君樂成其志雖授以業亦不屑屑以世情得失督望之。此則朱君之凡也。予曰

然乎否哉予未或見此君也明年壽六十國
人其子乞言予予以壽其親且祈有以諭之予
曰古今之養生者不出乎身心二字心恬身愉
生之基壽之徵也子夏果能承親之志益勉于
爲學是諭親于道所以壽其親者益永矣爰書
以昇之

壽商明洲七袞序

龍溪子讀易洗心亭上有客造而問曰儒者之
學與道家養生之術有以異乎龍谿子曰一也

而毫釐則有辨矣。千古聖人之學不外于性命。道家則有修性修命之術。易所謂盡性以至于命。乃道脉也。自聖人之道不明。儒者之學與養生之術各自爲說。道術爲天下裂。而其說始長。漢魏伯陽氏儒而仙者也。作參同契以準易而法象生焉。以乾坤爲鼎器。以坎離爲藥物。以屯蒙六十卦爲火候。稱名引喻。至不可窮詰。而其微旨不出于身心兩字。乾卽心也。坤卽身也。坎離者。乾坤二用。神寓於心。氣寓於身。卽藥物也。

二用無爻無位升降于六虛之中神氣往來性命符合卽所謂火候也而其機存乎一息之微先天肇基後天施化一息者性之根命之蒂也但吾儒之學主於理道家之術主於氣主於理則順而公性命通乎天下觀天察地含育萬物以天地萬物爲一體主于氣則不免盜天地竊萬物有術以爲制煉逆而用之以私其身而不能通于天下此所謂毫釐之辨也明洲子儒者也志于聖學有年而尤留意于叅同契之說每

爲予談及校訛闡要津津然若不啻口出可謂
精矣今年已七十而視明聽聰神氣不衰豈真
有得于是也耶仲春九日值其懸弧之辰同會
者將稱觴以進以予誤愛尤深屬一言以爲祝
夫人至七十鼎羸藥耗卦數日消尤不可無修
補之助所謂修補者一毫非有假于外近在
我心不離已身抱一長生之本而參同之旨也
所願吾子盡解外膠專志聖學益究其所未至
廓然虛中不以思慮營擾滑其心嗒然忘形不

動作煩勞累其身、目可見之行也、心無所滑、則
神常御氣而性自此可復矣、身無所累、則氣常
攝神而命自此可固矣、性復命固、目應萬變而
常寂然、不斲長生而長生之道不外于是、所謂
深山之寶、得于無心者也、若夫息息歸根、默證
玄理、尤伯陽氏之密機、予固學而未之能、何日
過予洗心亭、還當請益、用終究竟之說、固交修
之望也、

報恩卧佛寺德性住持序

蘇郡有報恩卧佛寺建始於吳煨於唐錢氏有國卽故址而新之寺有塔起於梁高十二層前釋伽殿後爲卧佛閣建炎之難亦煨爲燼元豐重建所存者九層卽蘇文忠公捨銅龜以藏舍利者是也在蘇城之北故俗呼爲北寺云寺有五院爲浙右名藍其塔後望天目前矚太湖東南巨鎮也正德壬申夏閏五月復煨於火相傳火光從東南飛入塔中須臾塔燼殿閣亦燼所存止太士一院劫數也嘉靖甲子鄉之諸大夫

士民始圖興復旣乃延請爲衆所信禪僧性空
及化主潘思俞賓誓於佛前銳意修舉前後其
得施金若干太府蔡侯助以方磚若干衆益競
勸工費易集至隆慶己巳九層規制煥然復新
前後殿閣漸有修復之機時蔡侯方育才興化
延予至蘇與諸士友談學助成絃歌之政衆謂
塔功落成周望遐覽可以盡東南之勝乃相期
蔡侯別駕招君司理張君同往觀之予先至乘
興先登抵第八層極目覽望形神恍恍在霄漢

外復下坐院中以待諸公之至已而先後報至
齋畢復從諸公登至第八層予曰最上一層留
以相待諸公極目已盡大觀不須更上也予復
謂昔賢譏對塔說相輪今諸君身已至塔中所
未盡者最上一層耳去相輪不遠則何如因相
與一笑蔡侯謂予曰先生年逾七十半晌間兩
度登塔而神不勞體不倦亦有道乎予曰昔嘗
從陽明先師遊登香爐峯至降仙臺絕頂發浩
歌聲振林麓衆方氣喘不能從請問登山之法

此段
可觀

師曰。登山卽是學。人之一身。魂與魄而已。神魂也。體魄也。學道之人。能以魂載魄。雖登十仞之山。面前止見一步。不作高山欲速之想。徐步輕舉。耳不聞履韋之聲。是謂以魂載魄。不知學之人。欲速躁進。疾趨重跨。履聲鏗然。如石委地。是謂以魄載魂。魂載魄。則神逸而體舒。魄載魂。則體墜而神滯。予以登山之法。登塔故。庶幾似之。若是。夫旣卽此是學。一切應感之迹。亦若是而已。下復相與坐院中。衆僧胡跪請曰。本山舊有

住持擇行僧通教興者主之、焚修接衆總理諸務、一寺之綱紀也。寺廢、住持亦隨以廢。今寺將興、復不可無人以主其事。予因贊之、蔡侯以爲然。盡呼寺僧數十人、列跪階下、目而擇之。衆中得一僧、氣貌殊衆、詢其名曰德性、果爲衆所推服。立以住持委之。觀者咸服以爲神。衆僧欲假重於予、且欲聞所以住持之義。復乞予一言以爲左券。予曰：住持之名、亦豈易稱。循名稽實、義不虛生。終日圓覺而未嘗圓覺者、凡夫也。欲證

圖覺而未極圓覺者菩薩也具足圓覺而任持
圓覺者佛也敎典言之卮也焚修衆務節之末
也得予所謂魂載魄之說始可以爲任持也已
未達爲之解曰夫所謂圓覺者神之魂也敎典
衆務魄之應迹謂之塵勞而主之者神也能以
神用則魂常勝魄終日順應而恒廓然是謂背
塵合覺一爲應迹所纏塵勞所勝則魂滯於魄
終日擾擾而恒冥然是謂背覺合塵背覺合塵
者凡夫也背塵合覺者羅漢也無背無合超然

平等無知而無不知者佛也更有最上一乘是
謂妙覺非言思之所及也德性既任住持不可
不通其義譬之登塔當以修行爲第一步日親
教典日事焚修日勤衆務不可以爲卮言末節
而忽之第一步行得穩實便是入圓覺之路頭
由凡夫可進於羅漢由羅漢可入於佛乘雖八
層九層以達於相輪可以馴至樹教基續慧命
振法門可不待外求而得始無忝大衆之綱紀
始不負上人擇任之盛心也書以勉之